

Waor of niet waor?

Dick van Bloemendaal, *tekening deur* Gerard Schut

Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Vur julie un vraag, mar vur mien un weet, welke wel of niet waor bin.

Mit pusjoen

In 1995 bin'k mit de vut 'egaon en vuuf jaor laoter kreeg ik mun pusjoen. In ut begin leek ut me helemaal niets, mar vanwege mun gezoendheid kos ut nie aarst. Ik bin altijd mit veul plezier naor m'n wark 'egaon, mar toen ik goed 'ereuken had an m'n vrieheid bie huus, wa'k blie dat ut warken of'elopen was. Verveeld he'k me nog geen dag. Veul verenugingswark en of en toe dees en geen us helpen mit un klusje, vulde mun tied aordug.

We gaon veul mit ut 'sleuphuus' vort, dat begint meest in april en gaot deur tot eind oktober. Un paor weken hier en un maandje daor staon bevalt ons best. Van tied tot tied us un weekje tuus, en dan ut sleuphuus mar weer ankoppelen en dur weer op uut. In de rest van ut jaor gaon we us hier en daor heen um un stad te bekieken of zo. Lest waren we in Amsterdam, overal naor toe mit de trem en 's middags winkelen. Noe vien ik an winkelen niks an, mar vur de goeje verstandhouwing moe'je wel.



We waren effen bie V.& D. binnen 'eweest en toen we daor uitkwamen, stung dur vlak bie un pliesie un bon uut te schrieven vanwege fout purkeren. Ik zèèg tegen die pliesie: "Kom kèèl, doe niet zo uutslovurug, die oto staot dur krek",

mar hie bleef rustug deurschrieven. Dat leek mu niks en toen begos ik, helemaol tegen mun gewoente in, die man uut te maken vur al wat lilluk is. Hie keek mu'n us an, pakte zun bonneboekje weer en begos opnie te schrieven an un tweede bekeuring. Toen mun vrouw dat zag, was ut huus van de dam, ze maakte um uut vur dienstklopper en meer zukke scheldnamen. De pliesie keek us op dur an en begos an zun darde bekeuring. Hie stopte ze alle dree achter de ruutewisser van die oto en keek heevug groos naor ut resultaot. Toen bin we mar veerder 'elopen, want we mossen op tied an ut stesjon wezen um de trein naor Putten te haolen. Zo beleeft je elke keer weer us wat aarst in die grote plaotsen. Zo'n uutstapje vienen we leuk en da's bar belangriek op oenze leeftied.

+++